

Regional News Unit AIR Aizawl
Wednesday, July 17, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n kumin hi inpuahchah kumah an puan avangin kumin bikah hian hand holding policy chu lian takin an kalpui thei dawn lo tih a sawi.
- Bairabi leh Sairang inkar Rel kawng siam meka hmasawna thlen tawh chin Lok Sabha MP Pu Richard Vanlalmangaiha'n a hmunah enin Hortoki Rel Station a tlawh.
- Lokayukta-a thubuai la chin fel loh te CBI chhuitir turin ZPM Legal Department chuan ngenna an thlen.
- External Affairs Minister Dr.S. Jaishankar-a chuan Mauritius nen tha taka an thawhdun chhonzawm zel tur thu a sawi.

<><><>

CM

Chief Minister Pu Lalduhoma'n kumin hi inpuahchah kumah an puan avangin kumin bikah hian hand holding policy chu lian takin an kalpui thei dawn lo tih a sawi a. Sum dinhmun that dan azirin hmalakna an nei lian chho zel dawn a, chutihlain thlai thar lei tur pali an thlan tawh te erawh chu an lei ngei ngei thung dawn a ni, a ti.

Mizoram State Policy Coordination Committee nimina an thutkhawmnaah Committee Chairman Chief Minister Pu Lalduhoma'n he thu hi a sawi a. CM Conference Hall-a an thukhawmnaah hian Loan based progress partner, Zau Policy leh line department inkaihhraina lam thilte an sawiho a. Member Secretary Pu Lalmalsawma Pachuau in policy inkaihhraina duan tlangpui leh tun financial year-a Hand Holding sum dah hman chhuah dan tura duan te a sawifiah a ni.

State Policy Coordination Committee-in nimina an thu ngaihtuah langsar te chu - Loan hmanga 'Bâna Kaih Policy' kalpui turah Credit Guarantee Fund Scheme for MSME hmanga zaa 100 loan guarantee - progress partner te pek theih dan leh buaipui chhoh mek a nih dan te, PMEGP, KCC leh loan danga a pung sorkarin a peksak theih tur zat te, progress partner thlan te tana training dan tur te, monitoring kalpui dan tur leh Hand Holding Policy official launching neih hmaa tihtur tul awm thei te an ni.

Hei bakah hian Zau Policy kalpui dan tur ruahmanna leh Hand Holding Policy hnimhnai department-te inbuatsaihna tur thil pawimawh te pawh an sawiho a ni.

<><><>

LS MP

Bairabi leh Sairang inkar Rel kawng siam meka hmasawna thlen tawh chin nimin khan Lok Sabha MP Pu Richard Vanlalmangaiha'n a hmunah enin Hortoki Rel Station a tlawh a, he hunah hian NF Railways hnuai hnthawktute a kawm.

Pu Richard Vanlalmangaiha chuan Rel kawng hmasawna chu chak taka a kal avangin hnathawktute hnenah lawmthu a sawi a, harsatna an tawh te pawh a hriatpui tih sawiin a theih chen chenah bawhzuisk a inhuam thu a sawi.

NF Railways Dy. Chief Engineer (Constructions), Harjema Meena-a chuan Mizoram Rel kawng dinmun leh mipuiin an chhawr tangkai dan tur hrilhfiain Rel kawng chu khualzin tan mai ni lo bungraw hlawn lian lakluhna tur leh Mizoram thlai thar thawn chhuahna tur pawimawh tak a ni dawn, tiin thlai thar chhe hma chi pawh awlsam takin a sawngbawlna hmun a thlenpui theih tawh dawn a ni, a ti.

MP tawiawmtu Pu R. Hrangtawna, Railways Consultant, Mizoram chuan hnathawktu hi Railway Recruitment Board (RRB) kaltlanga lak vek tur a ni dawn a, tualchhung mi lak theih tur chin chu hna sang a ni dawn lova, chuvangin, Mizo thalaiten exam an hmachhawn a pawimawh a ni, a ti a. Railway Consultant chuan, Hortoki Rel Station thlengin Commissioner of Railway Safety-in Rel kawng a tha tawh a ni tih a enfiah theih turin report pek a ni tawh a, enfiah thuai a ni ang, a ti a. Sairang thlengin tun thla July chungin hna zawh fel hman tum a ni a; tunah hian Kawnpui Station thleng Rel tlan thei tura buatsaih fel a ni tawh a, mahse Rel tlan tir a ni rih lo, a ti.

MP tawiawmtu Kolasib DC Pu Robert C Lalhmangaiha chuan, District thuneihna atangin tih tur tul ang apiang tih felsak nghal zel a ni ang tiin, Railway hnathawktuten harsatna an tawh lohna turin District Administration chuan theihtawp a chhuah zel tur thu a sawi.

Kolasib SP Pu David H Lalthangliana chuan, Rel kawng siamna hmanrua bo chungchang an chhuizui dan leh Police hmalak dan te MP a hrilh a, misual chhui zuina kawnga harsatna an tawh thenkhat a sawi lang bawh.

<><><>

CM

Governor Dr. Hari Babu Kambhampati leh Lai Autonomous District Council Chief Executive Member Pu C. Lalmuanthanga te chu niman Khan Raj Bhavan-ah inkawmin, Pu Lalmuanthanga chuan LADC harsatna leh mamawh hrang hrangte a thlen.

LADC, CEM chuan Gazetted post appointment leh LADC Fund hmuh, non-salary chungchang, kum 20 liam ta atanga tun dinmun thlengin a tlangpui Governor hi a hrilh a.

Governor chuan hemi chungchang hi Nodal Department, District Council & Minority Affairs-ah felfai zawka kalpui a nih theih nan thlen thin ni se a duh thu a sawi a. Department atanga harsatna a awm loh chuan dan ang taka kalpui thin a nih tur thu a sawi a. CEM-in an mamawh a thlen te chu lo en zui a nih tur thu a sawi.

LADC Chief Executive Member Pu C. Lalmuanthanga, hi Pu C. Lalsawmzuala, Chairman Town Committee leh Pu Thansiam, Deputy Secretary (GAD), LADC-te'n an tawiawm.

<><><>

SAITUAL - TAXATION

Taxation Department Saitual District huaihawtin Chhiah (GST) chungchang Saitual khawpui huam chhunga sumdawngte tan niman Khan Zirhona hun buatsaih a ni.

Hetah hian Jt.Commissioner of State Tax & GST Nodal Officer Pu C. Vanlalehhuana'n kalkhawmte chu zirtirin, chhiah lak dan kalhmang leh a hmanna an hriat phawt chuan chhiah pek chu tu tan mah a na lova, mipuite tan vêk chhiah tling khawm hi hman a ni, a ti a. Sawrkar pawhin amah ringawtin sum a nei lova, mipuite tan hmasawna hna thawk dawn pawh ni se khua leh tuite chhiah pek tling khawm atang thovin hna a thawk a; ram changkang apiangin chhiah pek an uar a, chhiah pe tha te chu mipui mimir pawhin hma an sawn nge nge a ni, a ti a. District thar zingah Saitual chu chhiah pe tha ber an nih mek thu leh chhiah pek kawngah hmasawn chhonzawm zel turin a sawm a ni.

Asst. Commissioner of State Tax & GST Nodal Officer, Pu Hrangthanmawia'n GST-a inziah luh dan te, PAN Card pawimawhna te, Income chungchang te, GST leh a kaihhnawiha sumdawngte hriat tur hrang hrang, sorkar-in chhiah a mamawh chhan te, GST Dan hnuai sumdawngte leh works contractor-ten an tih tur chanvo hrang hrangte leh chhiah pe tha duh lote enkawlina dan te a zirtir a. Kalkhawmte'n zawhna zawtin office lama bawhzui tur te leh kalpui zui dan turte inhrilh nghal a ni.

Saitual District-ah hian kum 2023 September ni 9 khan Deputy Commissioner of State Tax office hawn a ni a, tunah hian Asst. Commissioner of State Tax hovin an awm mek a ni.

<><><>

ZPM

Lokayukta-a thubuai la chinfel loh te CBI chhuitir turin ZPM Legal Department chuan ngenna an thlen.

Nimina ZPM Legal Department thuchhuahin a tarlan dan chuan, Mizoram Lokayukta-a case lian tak tak pending mek pathum - Ropeway leh Skywalk chungchang te, NABARD sum puk hmanga Mizoram School thawmthat chungchang te chu ACB ten an la chhui mek a. Lengpui Airport sak chungchang pawh Mizoram Lokayukta ngaihtuah turin a inchiah mek a; heng case-te hi mipui sum tam tak tihchingpenna ni ngeia an ngaih avangin CBI ngeiin chhui se an duh thu an sawi a ni.

ZPM Legal Department chuan Lokayukta danah Corruption case te chu chhui tura Lokayukta-in Order a chhuah atanga thla 6 chungza zawh tura tih a nih thu leh, an zo hman lo a nih chuan thla 3 aia rei lo hun pek belh theih a nih thu tarlan a nih thu an sawi a. Hetihlai hian Ropeway leh Skywalk chungchang chu ACB chhui turin nikum May ni 30 khan referred a ni tawh a, vawiin thlengin chhui zawh a la nih loh thu an sawi a. Mizorama school thawmthat pawh kumin February ni 13 khan ACB chhui turin hlan a nih tawh bawh thu ZPM Legal Department chuan an sawi bakah Lengpui Airport chu NGO pakhat Mizoram First te chuan nikum March ni 14 khan Lokayukta-ah Complaint an lo theh lut tawh a, a chhuina mumal tak vawiin thlengin a la awm lo nia an hriat thu an sawi bawh a ni.

<><><>

MNF PR

MNF Party chuan ZPM sawrkar chu an party mi Kuhva rah tawhthu humah an puh.

Nimin khan thuchhuah siamin MNF Party chuan tunhnaia Vairengte leh a chhehvela Kuhva rahro bothlau zawn chhuah tuma hmalakna kal zelah Mizoram Police te chuan Phaisenah 407 trip khat leh an lakchhuahna Kudam atangin bag 145 vel man chhuah a nih thu puanzar a ni a. He kuhva neitu nia rin hi ZPM Champhai South Block Information Jt. Secy. nia hriat a ni, an ti a. A unaunu te thlengin ZPM party mi nia sawiin Phaisen-a kuhva lo chheprelhsaktu pawh Phaisen ZPM Secretary a ni, an ti.

MNF Party chuan ZPM chu an sawrkar atanga thla khat chhunga dan lova bungraw tawlh tihawp tum nia an insawi lain a tawlh thintute zinga ZPM mi leh sa chu an mit an la siai khum zel a ni, an ti a, Kuhva bag 5000 chuang bo chhui chhuaka a rutu chungah hremna lek ngei turin an phut bawk a ni.

<><><>

EAM MET MAURITIUS PM

External Affairs Minister Dr.S. Jaishankar-a chuan Mauritius nen tha taka an thawhdun chhunzawm zel tur thu a sawi.Pu Jaishankar-a hian nimin khan Mauritius Prime Minister Pravind Kumar Jugnauth chu Mauritius khawpui Port Louis ah a kawm a. He hunah hian Prime Minister Narendra Modia aiawhin chibai a buk a. India leh Mauritius inkara inlaichinna hrang hrang te an sawidun a. Pu Jaishankar-a chuan ram pahnih inkara thawhdunna tlo tak leh nget tak awm chu lawmawm atih thu sawiin hun lo kal zel turah India leh Mauritius te inkarah inzawmna tha tak a awm zel a beisei thu a sawi a ni.

PM Jagnauth leh Dr.Jaishankar-a te hian High Impact Community Development Projects 12 an hawng bawk a ni.

<><><>

UNION SC AND TECH

Union Minister for Science and Technology Dr. Jitendra Singh chuan Asia-a a hmasa ber hriselna lam zirbingna "Pre-clinical Network Facility' chu Translational Health Science & Technology Institute, Faridabad ah a hawng. Union Ministry of Science and Technology sawidanin he hmun thar hawn hi khawvel pumah laboratory pakuana tur niin Asia khawmualah a pakhatna tur a ni a.

Dr. Singh-a hian Genetically Defined Human Associated Microbial Culture Collection (Ge- HuMic) chu a hawng bawk a. Research Institute, University leh industry te tan Research and Development atana hman turin microbial culture a pe thei dawn ani.

Union Minister hian Private Sector ten Department of Biotechnology nena vaccine siam na tura inremna a ziak bawk a ni.

<><><>

AFGHANISTAN FLOOD

Afghanistan-a Nangarhar province-a ruahsur leh tuilian avanga chhiatna thlengah mi 35 an thi a, mi 250 in hlliam an tuar. He chhiatna hi Jalalalbad khawpui, Sukh Rod District leh a chhehvel ten an tuar nasa ber a. Mitthi zat hi an la pun chhoh rin anih thu thuneitute chuan an sawi a.

Nangarhar thenawm Kunar province ah pawh khuarel chhiatna thleng avangin mi panga an thi a. Kumin May thla khan Afghanistan ah hian ruahsur nasa leh tuilian avangin mi 400 chuan an thi a ni .

<><><>